

XVII. *Dissertatio epistolaris de Ossibus et Dentibus Elephantum, aliarumque Belluarum in America Septentrionali, aliisque borealibus Regionibus obviis; qua indigenarum Belluarum esse ostenditur.* Auctore R. E. Raspe, Serenissimo Hassiarum Landgravio à Consiliis, et R. S. S.

SOCIETATI REGIÆ SCIENTIARUM LONDINENSI.

Read May 11, 1769. **P**E R S C R I P S I T ad me illustris Pringlius, baronettus: " Media nū
 " per in America Septentrionali, non procul ab
 " Ohio fluvio, intra spatum duorum aut trium
 " jugerum terræ paludosæ, sale fœcundæ, sceleta
 " triginta belluarum majorum inventa fuisse, nulla
 " aut rara terra solum sepulta: Si magnitudinis
 " ossium atque dentium majorum habeatur ratio, ele-
 " phantina videri; ob formam molarium dentium,
 " qui carnivori potius sint animalis, ambigi cui bel-
 " luarum speciei tribuenda; quæri inter naturæ stu-
 " diosos de phænomeni causis; pro sua in me bene-
 " volentia et meam rogare sententiam."

Hanc dissertationem, quamvis difficultates quæstio-
 nis magis ostendat quam solvat, malui judicio vestro
 potius

potius subjecere quam dare aliud quodvis studiorum
meorum documentum.

Duplex proprie est quæstio; altera, “ de causa,
“ quæ harum belluarum ossa in Americam Septen-
“ trionalem transvexerit ? ” Altera, “ quæ in tam
“ brevi spatio concluserit et sepelierit ? ”

Primam soluturo occurrit :

1. Historicorum Americæ constans observatio,
omnem hanc novi orbis terram, cum tribus fere ab-
hinc seculis detecta Europæis patere cœpit, nonnisi
à quadrupedibus minoribus fuisse habitatam; pere-
grina igitur videri illa, sive elephantum sive aliarum
belluarum colossalium sint ossa.

2. In mentem redeunt ossa majora in Asiæ aut
Sibiriae borealibus regionibus inventa et obvia, quæ
subterraneo lucifugo animali, quod Mammout dicitur,
tribuit fabula, elephantis aliisque belluis vindicant
commentarii Petropolitani et Gmelinus in Itinerario
Sibiriaco. Nec in Asiæ et Americæ solum borealibus
provinciis ea occurrunt, effodiuntur etiam in Europæ
climatibus septentrionalibus.

De Britannicis huc pertinentia quædam in Trans-
actionibus vestris legisse memini. De Suecia fidem fa-
ciunt Holmienis academiæ commentarii. Ex Ger-
mania naturali historia minus vulgatas aliquot obser-
vationes addere liceat.

Nil moror gigantum ossa, quæ credula antiquitas spe-
ctanda servavit in cathedralibus quibusdam templis, ut
Halberstadensi, Ganderstæmensi, aliisque. Huc facere
quidem videntur, sed certiora repeto et primo quidem
ex electoratus et ducatus Brunsicensis naturali historia,
diligentius olim à me perscrutata. Recordemini ossium
in antris Baumanniano, Schartzfeldensi, et prope Dü-
nam

nam in Hercynia effosorum. Ea scriptis eruditorum Leibnitzii in *Protogæa* et Hollmanni in Commentariis Goettingensibus celebrata sunt, atque cuilibet inspectanti belluarum majorum terrestrium esse videntur, ex parte rhinocerotum ossibus persimilia ab Hollmanno demonstrata sunt. Dente majorem, elephantinis forma et substantiæ textura exæcte convenientem et ad Fischbeckam prope Hamelam ad Visurgim inventum, quem Hannoveræ in instructissimo suo museo servat mihi amicissimus Andreæ, plus una vice manibus versavi. Vidi etiam Blumenaviae prope Hannoveram effosam majorem costarum incerti animalis. De specie belluæ majoris ad Quedlinburgum effosæ, cuius meminit Guerickius Magdeburgensis consul in libro *de vacuo*, quam maxime anceps est quæstio. Certius pronunciarer licet de dentibus, in fundamentis jaciendis urbis Neo-Casselensis, quam nunc inhabito et per Serenissimi Landgravii Hassiarum in me cumulatam et liberalitatem et gratiam alteram prædico patriam, effosis. Isti elephantini sunt; et cum aliis naturæ et artis miraculis in museo publico, mihi ex parte concredito, servantur. Plura non addo exempla, non quod deficitat materies, nam et antiquitas Græca et Romana et quicquid fere est cultiorum populorum similia adnotavit; adducta vero sufficiunt ad probandum “ in omnibus borealibus regionibus et antiqui et novi orbis inveniri majorum belluarum ossa, quæ vivæ in illis non supersunt, et per cœli inclem tam nunquam in illis generasse videntur.”

3. Subit accuratius perpendendus situs et natura soli in quibus deprehendi solent.

In

In stratis lapideis, corporibus matinis mixta, inclusa, tecta inveniri nusquam legi.

Delitescunt in cavernis montium ut in tribus illis Hercyniæ antris; aut palude, aut terra hortensi, aut limo exterioris superficie terræ vix contecta atque involuta jacent, quod de Americanis, Sibiriacis, aliisque, ex relationibus fide dignis, constat.

Nec etiam, ut corpora marina saxis inclusa, lapidis duritatem et naturam induerunt. Diversimode calcinata, parum aut nihil mutata sunt.

In Europæ septentrionalibus plagiis rarius jam et solitaria fere deteguntur, forte quod exhausta curiositatis materies, et quod diutius habitatæ a populis miraculorum et medicamentorum appetentibus, nam ossa hujusmodi, eboris aut unicornu fossilis nomine, in officinis pharmacopœorum prostant, et nescio quam illis antidoti mirabilem vim tribuerat antiquitas.

In ipsis quoque Americæ et Sibiriæ terris, habitatione marinorum corporum in lapidem versorum immensæ copiæ, rariora sunt; et minor utique belluarum terrestrium progenies in natali earum terra, quasi secus non suffectura, observata fuit.

Quæ omnia si recte animo colligantur duplicum eamque ad rem facientem suspicionem movent; alteram "alio plane modo hæc ossa sepulta esse, quam quæ profundius in lapidibus latent corpora marinæ; alteram non esse peregrinas et marinas belluas hisce, quarum sunt partes, sed fato suo, aut hominem vi, illas in ipsis hisce borealibus terris, olim illis natalibus, extinctas fuisse."

Quæstio igitur proposita, jamque solvenda, est de generali quadam causa, quæ has belluas, aut sub sole

tantum calente degentes, in Septentrionem transfluerit, aut extinxerit similes illis species olim Septentrionis incolas.

Si peregrinas alioque advectas et cœli solùm calidioris progeniem statuamus, omnis definitio periculosa videtur.

Terræ motuum et Vulcanorum vis, quæ insulas produxit et montes, et rationem sufficientem reddit stratorum lapideorum, variè inclinatorum et ruptorum, illisque inclusorum marinorum corporum, nil valet ad advehendas orientis et meridiei bestias. Superficiem terræ fundique marium mutat. Climata inconcussa manent.

Diluvii universalis Noachici aut Deucalionei cūjusdam effectibus, præter alia multa, quod supra notavi, obstat, ossa hæc vel in cavernis montium, solitis ferarum latebris, aut paludibus aut superiore solum terra, solitaria quadammodo, nunquam corporibus marinis tecta, mixta, inclusa deprehendi. Nec etiam, quæcunque tam mirabili aquarum super omnem continentem effusione tribuatur vis et potentia, concipi animo potest, quare ossa et cadavera hæc graviora ex meridionalibus regionibus in septentrionales transvexerit, eaque in alta potius mediaque continente terra deposuerit, quam in oceani abyssis, nisi forte cum Woodwardo perplaceat diluvii tempore nullam omnino gravitatis fuisse actionem, quod quidem perme licet, neminem vero vestrum rapiet in assensum.

Si recurramus ad antiquitatis remotissimæ heroas, belluis uti belli instrumentis utentes, easque invitæ cum militibus suis æque forte invitis in ultimam Europam, Sibiriam, atque Americam vi, metuque propellentes, quæstionem non solvimus sed impedimus.

America enim toto oceano ab antiquo orbe divisa, et quicquid dicant veteres, navalis eorum scientia exercitibus cum elephantis in Americam ex Asia aut Europa transvehendis non sufficit. Quatenus etiam lux est in antiquorum temporum historia et moribus, sero quadrupedes in bellum domarunt, elephantos primò nonnisi Asiæ et Africæ reges. Tenebris vero historiarum, quæ maximam antiqui orbis partem premunt, ad fabulas novas fingendas meo quidem iudicio abuti non licet, nisi forte de quibuscumque historiæ et orbis terris incognitis impune mentiri liceat.

Peregrinas igitur non esse nec aliò advectas has Septentrionis belluarum majorum reliquias quam maxime prona est conjectura; idque et illi sensere, qui climata terræ mutata, eoque ipso omnem controversiam definiri posse putarunt. Vereor autem ne eorum hypotheses, nimio autorum ingenio, collapsuræ fint.

Climata terræ, eodem orbitæ, qua circum solem revolvitur, diametro servato, dupli modo mutari atque affici posse videntur; aut magis imminuta istius orbitæ sive ecliptices obliquitate magisque ad planum æquatoris inclinata; aut axeos terræ centrique gravitatis sumta quadam mutatione, quæ cum climatis simul et terræ figuram mutat..

Prior hypothesis mirè arrisit recentioribus quibusdam philosophis, tum quod problema propositum apparenter solvat, tum etiam quod talis quædam orbitæ vel ecliptices inclinatio ejusque obliquitatis diminutio revera accedit, si quidem Eratosthenis atque Hipparchi, novemdecim ab hinc seculis institutis, observationibus sua fides constat. Illi eclipticam ab æquatoris plano suo tempore $23^{\circ} 51' 20''$ recedere nota-

runt, quam celeberrimus De la Caille nostris diebus $22' 59'' \frac{1}{2}$ minorem observavit in Promontorio Bonæ Spei, uti quidem notavit in *Leſt. Elem. Astron.* Nolo contra antiquarum observationum fidem disputare, nec repetere quæ de incertitudine annuarum legum hujus imminutæ ecliptices obliquitatis et de causa ejus non perpetua, inter astronomos disputata sunt. Concedam potius multo majorem olim fuisse ecliptices obliquitatem; ipsa vero mea in hujus hypotheseos patronos liberalitate vincam. Quamcunque enim majorem orbitæ obliquitatem fingere velint, nunquam tamen eò evitabunt necessariò inde provenientes tempestatum anni vicissitudines, naturæ elephantorum quammaxime contrarias. Extendant tropicos ad quinquagesimum et ultra latitudinis gradum; intendant quantum velint calorem æstivum, et certe magis intensus fiet majore orbitæ obliquitate, et magis directe solis radiis in zonas, quas inhabitamus, incidentibus, quid elephantis, quibus illa hypothesis in nostris regionibus commodas, et vivendi et generandi sedes parare satagunt, inde commodi? Non equidem video: sentio potius, idque sphæroïdea terræ figura ipsaque major ecliptices obliquitas cuilibet perpendiculari facile persuadebit, majorem hunc æstivum calorem, constante semestri vicissitudine, majus etiam frigus hibernum infeceturum, quod tantum abest ut elephantorum naturali progeniei in zonis borealibus conveniat ut potius illi quammaxime obstat.

Quod ad axeos terræ centrique gravitatis mutationem attinet, ea aut momentanea esse debuisset, aut lenta, et per gradus successiva.

Si prius; hypothesis cœlum Acherontaque movet, summa miscet imis, omnemque hominum et animantium

lium viviparorum progeniem fato subitæ mortis, et sine miraculo inevitabilis involvit, in perpetuum interitum et sine novo creationis miraculo non reviviscendam; ejusmodi enim mutatio, quæ meridionales zonas olim inter tropicos fitas uno temporis momento boreæ objiciat, sine universali terræ ruina exitiali cogitari nequit, si, quod verissimum demonstravit Newtonus, rotatio orbis polos deprimit æquatorem pandit, diameterque terræ per polos ductus minor sit altero æquatoris septem et quod excurrit milliaribus Germanicis. “Quis talia fando temperet à lacrymis!” Tam violenta etiam climatum mutatio boreæ olim incolarum cadavera sub æquatorem in meridionales terras transvehere debuisset, quod an experientia confirmetur viderint alii quibus hæc arrident.

Sed lento gradu procedere potuit illa figuræ terræ, climatum et axeos mutatio? Concedam. Sed quare non amplius procedit? Quis impedit ne, certo quodam et procedenti axeos mutationi respondente progressu, meridionales plagas cum terræ trepidatione et mugitu versus boream procedentes paullatim deprimat et mergat, boreales vero ad meridiem jam tendentes extollat oceano? Constantes sibi fingamus naturæ leges aut nullas. Non enim senescit.

Redeo igitur ad illam, quam supra jam indigitavi, suspicionem, suo fato, aut hominum vi, obiisse belluas, quarum ossa nos exercent, ubi deprehendimus, nec peregrinas esse, nec marinas. Ea sola minoribus difficultatibus laborat. Quamvis enim nec climata, nec axem terræ, nec ejus figuram mutandam propterea censem, sunt tamen quædam quæ obstatre illi videntur, quo minus pro generali aliqua phænomeni propositi

propositi causa haberi possit; sed obstatre tantummodo videntur.

Maximam difficultatem hoc parit, pro elephantinis aut meridionalium belluarum ossibus haberi; Septentrionem et omnem Americam elephantos similisque voluminis animalia non generare; et si animalium et climatum natura constans sit, et perpetua, nunquam generasse.

Totius igitur quæstionis cardo versatur circa natu-ram horum ossium: an reverâ elephantina aut talia fint, quæ animali in septentrione degenti convenire non possint? Et mihi quidem plus quam indecisa videtur illa ossium natura; certè elephanto vindicari non possunt molares dentes, simul cum reliquis in America eodem loco inventi; nec etiam alia ossa in Sibiria et Hercyniæ cavernis obvia illi convenient, quod accuratius perlegenti commentarios Petropolitanos et Gmelini itinerarium, et sine præconcepta opinione inspectanti ossa, sat clarum erit. Si per anato-miam omnium quadrupedum imprimis belluarum inter se comparatam, habito respectu ad diversas illarum ætates, quæ ossium formam mutant, constaret, nullum cujuscunque animalis os alteri convenire et convenire posse, quod non constat; tum quidem co-actus confiterer re verâ elephantina esse quæ videntur, reliqua quæ elephantina non videntur adscribenda speciei nondum nec in India nec alibi terrarum ob-servatae. Quod an difficultates omnes expeditat judi-cate ipsi; ne enim repetam cum nulla hypothesi ele-phantorum meridionalium sub septentrione ossa conciliari posse, anne admittenda erit alia belluarum spe-cies nondum observata, cui molares dentes elephantis non

non convenientes adscribantur? Species forte nullibi superstes, si quidem nobis datum est omnes nosse, omnes ritè descripsisse? Exstirpata fortè aut emor-tua? Aut etiam nescio in quo mundi angulo, philo-sopho nulli viso, adhuc delitescens?

Quæ cum ita sint, licere mihi puto omnia hæc septentrionis colossalia ossa uni solum speciei incog-nitæ, olim septentrionis incolæ, aut adscribere etiam diversis. Tum me reliquarum hypothesium omnium defectus non vexabunt, et magnis me difficultatibus me explicuisse putabo — “ forte ut incidam in Scyl-“ lam volens evitare Charybdim,” quod vestrum ju-dicium esto.

Integras ferarum species in Britannia, Germania, aliisque Europæ provinciis penitus exstirpatas, aut quam proxime emorituras ipsi nostis, aut quod nocivæ habitæ fuerint, aut in pellibus et carnibus earum luxuriatum sit genus humanum. De lupis, ursis, alce, uro, plerisque, Cæsaris ævo, in Germania Rhe-nana obviis sermo mihi est. Quidni igitur noxiā aliquam belluæ speciem, rarius generantem per lon-gam seculorum seriem exscindere potuisset septentrionalium populorum ab omni historiæ memoria cele-bratum venationis et bellicæ fortitudinis studium? Certe ea via ad gloriam ibant omnes, et Herculem et quem-vis primi seculi heroa acrem monstrorum debellatorem cantat fabula. Castorum et zibellinorum speciebus simile quid nostris ferè diebus accidit, eoque minus de almæ naturæ lege, species omnes servante, contra me disputari potest; et in seculo quidem pluribus animantium speciebus fatali, et ab homine in omnium serè specierum individua sævo. Species etiam in septentrione non superstes superesse possunt in zonis antarcticis

antarcticis nostris borealibus parallelis. Quis negat? quis novit?

Elephantorum Africæ, Indiæ, et Ceylanensium diversitatem quandam notant naturæ historici, Ceylanenses reliquis omnibus magnitudine et ingenio præcellere prædicantes. Esse igitur potuit elephantorum species in ipso septentrione, reliquis omnibus præcellens frigoris patientia, et à meridionalibus elephatis non magis diversa quam Lappones aut Hurones diversi esse solent a Nigris et Malabaricæ incolis. Sed certi quid pronunciare non ausim. Sufficit, omnium reliquarum hypothesis insufficientiam, naturam situs et ossium ipsorum, tandem etiam exempla extirpatorum specierum persuadere, quammaxime probabili quadam ratione, belluas quarum ossa in septentrione hinc inde latent, non esse peregrinas, non aliò advectas sed indigenas in illis terris, ipsis olim natalibus, vixisse, generasse, quamvis hodie non supervent.

Altera jam quæstio de causa, quæ tam ingentem sceletorum atque ossium acervum in tam brevi Americæ Septentrionalis spatio concluserit et sepelierit? quammaxime est expedita. Latebant in terra paludosa, sale fœcunda, rara solum terra tecta; non quod hæ belluæ de salinarum, dominio et proprietate humana quadam arte et crudelitate, invicem debellarint et fortitudine sua ceciderint in fundo ad præliandum quammaxime incommodo, quod videri poterat primo obtutu et jocabundo cuidam amicorum meorum videbatur; sed quod salis liguriendi deliciis in paludem allectæ, paludosa terra ponderi corporis cedente, haustæ, impeditæ, sepultæ fuerunt, luxuriem et voluptatem morte luentes.

Hæc fere sunt quæ ad solvendas aut impediendas supra nominatas quæstiones mihi quidem dici posse videntur, elegantius forte et doctius dicenda, si magis verborum limatorum illecebris munerumque pretio atque pondere quam dantis et scribentis animo deliniendi et capiendi foretis. Illum vero vobis addictissimum testor, sincera vota pro vestræ Societatis in columitate et flore fundentem, vestræque salutis et veritatis omnis cupidissimum.

R. E. Raspe.